

Na osnovu člana 22. i 24. stav 1. Zakona o Vladi Kantona Sarajevo ("Službene novine Kantona Sarajevo", broj 24/03 - Prečišćeni tekst), a u vezi sa članom 23. Zakona o dopunskim pravima boraca - branitelja Bosne i Hercegovine ("Službene novine Kantona Sarajevo", broj 9/07 - Prečišćeni tekst, 7/08 i 33/08), Vlada Kantona Sarajevo, na 21. sjednici održanoj 23. juna 2009. godine, donijela je

## **UREDBU**

### **O IZMJENI I DOPUNI UREDBE O FINANSIRANJU PROGRAMA ZA OTVARANJE RADNIH MJESTA ZA BRANIOCE, RATNE VOJNE INVALIDE, PORODICE ŠEHIDA I PORODICE POGINULIH, UMRLIH I NESTALIH BRANILACA**

#### Član 1.

U Uredbi o finansiranju programa za otvaranje radnih mjesta za branioce, ratne vojne invalide, porodice šehida i porodice poginulih, umrlih i nestalih branilaca ("Službene novine Kantona Sarajevo", broj 31/06) u članu 5. stav (4) riječi: "Kreditnom odboru za dodjelu pozajmica za finansiranje programa (u daljnjem tekstu: Kreditni odbor) dostavlja prijedlog odluke za rješavanje po zahtjevu", zamjenjuju se riječima: "nakon dostave mišljenja Stručna služba Ministarstva sačinjava odluku za rješavanje po zahtjevu."

#### Član 2.

Član 8. mijenja se i glasi:

#### "Član 8.

(Poslovi i zadaci Stručne službe Ministarstva)

(1) Stručna služba Ministarstva osim poslova propisanih u čl. 4. i 5. ove Uredbe, obavlja i sljedeće poslove i zadatke:

- a) rješava po zahtjevima za dodjelu pozajmica za finansiranje programa;
- b) rješava po zahtjevima za reprogramiranje pozajmica za finansiranje programa u korištenju;
- c) rješava po zahtjevima za oslobađanje od plaćanja posljednje rate pod uvjetima iz stava (5) člana 6. ove Uredbe;
- d) organizira edukaciju potencijalnih korisnika ovog prava;
- e) analizira stanje odobravanja i otplate realiziranih pozajmica za finansiranje projekata;
- f) po potrebi angažuje operativni tim za kontrolu namjenskog korištenja pozajmica putem obilaska ili nalaže snimanje stanja poslovanja u firmama koje kasne sa otplatom;
- g) godišnje izvještava Vladu Kantona Sarajevo i daje prijedloge za otpis pozajmica čiji povrat nije moguće ostvariti;
- h) obavlja i druge poslove od značaja za pozajmice za finansiranje programa."

Član 3.

Ovlašćuje se Ured za zakonodavstvo Vlade Kantona Sarajevo da izradi prečišćeni tekst Uredbe o finansiranju programa za otvaranje radnih mjesta za branioce, ratne vojne invalide, porodice šehida i porodice poginulih, umrlih i nestalih branilaca.

Član 4.

Ova Uredba stupa na snagu danom objavljivanja u "Službenim novinama Kantona Sarajevo".

---

Broj 02-05-19533-24/09  
23. juna 2009. godine  
Sarajevo

Premijer  
**Besim Mehmedić, s. r.**